

Eichentlich hätts eich lange misse ...

Om Sunndaach vor acht Daach korz vorm End vom Friehschoppe hawwe merr uns gewunnert, dass de Schorsch so fünf vor zwölf gonz nerwees geworn iss, weiler seit zeh Minutte bezahle wollt. Weil awwer die Mädcher im Herrsch allminonner so vill mett Essebestellunge ze due hatte, hottsem uff oomol mettem Bezahle zu long gedauert unn doo hotter zu mir gesacht: Honnes, heit muss ich pinktlich um zwölf dehoom soi, sei so gut unn bezahl emol ferr mich mett, ich glaab ess kost fünf Euro sechzich, ich gebb derrs om nächsde Sunndaach widder – unn fort warer.

Mir warn dess vom Schorsch nit gewehnt, hawwe unns ludsich iwwern gemacht unn hawwem noochgerufe: Um zwölf werdd gesse, egal ob was gekocht iss odder nit! Unn alser fort war hawwe merr gelästert, de Karl unn ich: Villeicht hotter e schlecht Gewisse, dasser gestern Owend nit beizeit vom Holzgassefest hoomkumme iss, odder dasser im Beisoi vom Kättche de Kellnerin vom Joffche scheene Aache gemacht hott, odder dasser e Glas Bier umgeschmissee hätt odder so was. Jedenfalls hawwe merrr gemoont, dasser bei soine Fraa was gutzemache gehabt hätt.

Om letzde Sunndaach kam de Schorsch e bisje später on de Stommdisch unn hott merr gleich fünf Euro sechzich abgezählt in die Hond gewwe. Donke schee ferrs Bezahle, ess stimmt doch? hotter gefroocht unn ich habb gesacht: Ja stimmt. Aach Donkeschee.

Saach emol, hott dann de Karl de Schorsch gefroocht, was war dann letzt Woch los? Du bist joo ab wie die Feierwehr unn es war noch nit emol zwölf?

Unn ich saach: Du haddst bestimmt bei doine Fraa was gut ze mache - was hattsde dann om Somsdaach widder geschafft, merr kann dich werklich nit alloo losse.

De Schorsch druff: Naa, ess war nix Besonderes, ich hadd nor dem Kättche versproche, pinktlich um zwölf dehoom se soi. Sunnst esse merr joo um halb oons, awwer om letzde Sunndaach wollte merr mettem Audo fort unn doo hottse gemoont, dass merr nit später als halb zwaa fortfahrn sollte. Unn deshalb wollt se Punkt zwölf dess Esse uffem Disch hawwe, weil se sich joo nooch emm Esse immer nochemol gern e Verrdelstund hieleeche dut unn sich joo aach noch in die Reih mache muss.

No ja, hott de Karl gemoont, es wär uff fünf Minutte doch nit ookumme, odder?

De Schorsch hott in soi Bierglas geguckt unn dann de Kopp gehowwe: Wissder, mir butze uns sunndaachs nooch emm Friestick die Schnut ab unn mache uns on de Stommdisch, unn die Fraa roomt dess Gescherr vom Disch eweg, stellt's in die Spülmaschin, macht die Better, roomt die Wäsch in die Wäschkich, kocht dess Esse, telefoniert mett de Kinner, unn weil merr fort wolle leecht se ferr mich e onner Hos, e frisch Hemd unnen Schlips hie, berrscht iwwer moi Schuh, unn wenn ich vom Stommdisch hoomkumm, stehn schunn die Deller uffem Disch unn ich kann mich gleich devor setze. Dess mächt se all während ich hier sitz unn mett eich dumm Zeich schwätz. Unn dann hottse oomol was vor, will ferdich werrn unn dann det ich se warte losse? Naa, ich will nit, dass dann nerwees werdd nor weil ich nit ebeikumm.

Ich habb e bisje belämmert geguckt unn habb gesacht: Ei wenn ich dess gewusst hätt hätt ich doch so koo bleede Bemerkunge gemacht.

Aach de Karl war nit mett sich zefridde unn hott gemurmelt: Dut merr laad!

Doo sacht de Schorsch: Ich habb eich gesacht ich muss pinktlich dehoom soi unn dess hätt eich lange misse. Wenner aach Freunde seid, brauch ich eich doch nit alles gleich uff die Nas ze binne!

Eiern Honnes